

Vijećnička pitanja

Dževdet Huskić: je postavio dva vijećnička pitanja. Prvo je da li će u 2024. godini biti raspisan javni poziv za subvencioniranje kamata za rješavanje stambenog pitanja mladih? Napomenuo je da je posljednji poziv za subvencioniranje kamata za rješavanje stambenog pitanja mladih objavljen 25.08.2022. godine i odnosio se na period kupovine stana ili izgradnju objekta u proteklih više od 3,5 godine (od 01.01.2019. godine). Također, podsjetio je da je prošle godine bilo planirano 70.000 KM za tu namjenu, ali nije ništa utrošeno, dok je u Budžetu za 2024. godinu planirano 65.000 KM, te ga zanima da li je u planu raspisivanje javnog poziva za subvencioniranje kamata u 2024. godini i da li će isti obuhvatiti sve mlade koji su riješili stambeno pitanje od prošlog javnog poziva do trenutka raspisivanja novog. Drugo pitanje je kakvi se radovi izvode i na osnovu čijeg naloga ispred boračke zgrade na trafo-stanici u Ulici branilaca? Parcela na kojoj se nalazi boračka zgrada je kupljena svojevremeno za boračku populaciju, koja je kupila stanove i ista je u vlasništvu stanara. Pita se ko je taj ko može ulaziti u tuđi posjed i bilo šta raditi bez dozvole oko trafo-stanice koja je također tada donirana stanarima zgrade, uz napomenu da predsjednik kućnog savjeta nije upoznat sa situacijom, kao ni stanari pomenute zgrade.

Marcela Ravlija: je postavila vijećničko pitanje zašto Općina Kakanj nije poslala prijedlog projektnih aktivnosti na poziv Federalnog ministarstva okoliša i turizma, a u svrhu proglašenja Trstionice novim zaštićenim područjem? Napomenula je da je u decembru prošle godine, Behija Kulović, zastupnica NS u Skupštini ZDK, uputila zastupničko pitanje Federalnom ministarstvu okoliša i turizma na temu aktivnosti Ministarstva oko zaštite prašume Trstionica, te budućih planovi za uspostavu zaštićenih područja u ZDK. Na osnovu toga je Ministarstvo zatražilo u septembru 2023. godine od Općine Kakanj da dostavi prijedlog projektnih aktivnosti u cilju sufinansiranja istih, a tiču se proglašenja Trstionice novim zaštićenim područjem. Prema informacijama kojima raspolaže Općina Kakanj u ostavljenom roku nije dostavila prijedlog projektnih aktivnosti.

Vinka Aletović: je postavila vijećničko pitanje šta se planira poduzeti po pitaju izgradnje dječijeg igrališta sa futsal terenom po zahtjevu mještana naselja Ivnicica? Naime, mještani Ivnicice su sačinili idejni projekat izgradnje dječijeg igrališta sa futsal terenom. Projektom je obuhvaćeno finalno rješenje izgradnje dječijeg igrališta na određenoj lokaciji u Zagrađu sa fudbalskim terenom, a preostali dio parcele je planirano da se uredi i pertvori u dječije igralište.

Armin Bašić: je postavio dva vijećnička pitanja. Prvo pitanje je u kojoj fazi se nalazi postupak vraćanja prostora zelene pijace u vlasništvo Općine Kakanj, obzirom da je protekla godina dana od isteka roka u kome je kupac, prema potpisanom ugovoru, bio dužan predati novoizgrađenu pijacu Općini Kakanj? Drugo pitanje je koji je iznos novčane naknade koju JP „Vodokom“ Kakanj plaća „vlasniku“ zelene pijace po osnovu zakupa iste?

Predsjedavajući je konstatovao da su vijećnici: Branko Češljčić, Sabit Čehajić, Edin Šljivo i Mirsad Tursum postavili vijećničko pitanje bez korištenja govornice.

Branko Češljčić: je postavio dva vijećnička pitanja. Prvo je zašto građani općine Kakanj koji koriste vodu iz gradske vodovodne mreže u aprilu 2023. godine nisu bili upozoreni od strane JP „Vodokom“ Kakanj o povećanoj koncentraciji kadmijuma u vodi za piće? Ko je odgovoran za navedeni propust i da li građani općine Kakanj trebaju biti zabrinuti da i u slučaju eventualnih budućih pogoršanja kvaliteta vode neće biti blagovremeno upozoreni? Drugo pitanje je da li je promjena regulacije saobraćaja na raskrsnici regionalnog puta Kakanj-Tršće-Ponijeri i lokalnog puta za naselje Tršće urađena u skladu sa saobraćajnim projektom-elaboratom i da li je navedenu promjenu izvršilo ovlašteno preduzeće/institucija ili je promjenu regulacije saobraćaja izvršio neko samovoljno? Naime, već duži niz godina put sa pravom prvenstva prolaza je bio regionalni put Kakanj-Tršće-Ponijeri, dok je na spoju lokalnog puta iz naselja Tršće bio postavljen saobraćajni znak „Obavezno zaustavljanje“ (STOP). U posljednjih mjesec dana saobraćajni znak (STOP) je premješten na regionalni put Kakanj-Tršće-Ponijeri iz smijera Ponijera i time se prvenstvo dodijelilo vozilima koja izlaze iz naselja Tršće.

Sabit Čehajić: je postavio vijećničko pitanje koji vid zaštite postoji na bazenu vode Plandište-Bare i da li uopće postoji zaštita (fizička ili videonadzor), a iz razloga što postoje saznanja da na predmetnom objektu dolazi do okupljanja i zadržavanja nepoznatih lica?

Edin Šljivo: je postavio vijećničko pitanje zašto u naselju Povezice (ulica 1. mart) nema kontejnera za odlaganje smeća, a bio je prethodnih godina, dok mještani i pored toga odlažu smeće na to mjesto, ali se isto nikako ne odvozi?

Mirsad Tursum: je postavio vijećničko pitanje da li će i kada biti izvršeno priključenje vode za novoizgrađenu ambulantu Krševac? Naime, JU „Dom zdravlja sa stacionarom“ Kakanj je sve uradila što je trebalo da se dobije dozvola za rad ambulante, ali je u nemogućnosti da počne sa radom iz razloga što nije priključena voda.

Vijećničke inicijative

Armin Bašić: je pokrenuo dvije vijećničke inicijative. Prva inicijativa se odnosi na izgradnju trotoara uz regionalnu cestu R-445 i to na dijelu puta od Donjeg Kaknja prema gradskoj jezgri, zatim na dijelu puta od mosta u naselju Doboj prema Čatićima, te na dijelu puta od naselja Brežani u pravcu Kraljeve Sutjeske uz regionalnu cestu R-466. Druga inicijativa je da se izdvoje i dodijele novčana sredstva za adaptaciju, izgradnju munare i uređenje prostora oko vjerskog objekta – džamije u naseljenom mjestu Koprivnica. Predmetni objekat već duži niz godina zahtijeva određene popravke i adaptaciju, a posebno kada je u pitanju munara koja je drvena i dotrajala, te bi vremenom mogla predstavljati opasnost za vjernike i prolaznike.

Općinski načelnik (odgovor): je dao pojašnjenje u vezi prve podnesene inicijative i rekao da je Općina Kakanj, a nakon sastanka sa resornim ministrom, u novembru mjesecu podnijela zahtjev za uvrštavanje infrastrukturnih projekata vezanih za Kakanj, u programe Ministarstva za prostorno uređenje. Tu se prije svega nalaze regionalne ceste koje prolaze kroz teritoriju općine Kakanj, a između ostalog navedeni su i trotoari na pojedinim dionicama duž regionalnih cesta. Rekao je da mu je iz medija poznato da je dio sredstva iz Budžeta ZDK planiran i za izgradnju trotoara na području ZDK, ali da ne zna šta je konkretno planirano da se uradi na prostoru općine Kakanj. U svakom slučaju, tražit će se od Ministarstva da daju odgovor koji od projekata iz podnesenog zahtjeva je planiran za realizaciju u 2024. godini.

Dževdet Huskić: je pokrenuo dvije vijećničke inicijative. Prva inicijativa je da se u užem gradskom području izgradi besplatna autopraonica sa desetak jednostavnih stanica za pranje auta. Obzirom da Općina i nadležno komunalno preduzeće nisu u stanju održavati gradske ulice čistim, predlaže da Općina investira novac u prvu besplatnu autopraonicu u BiH sa većim brojem stanica za sapiranje vozila, barem desetak. Ove stanice ne moraju nužno biti opremljene kao privatne autopraonice, dovoljno je da građanima na raspolaganju bude barem čista voda u trajanju od 3 minute. Druga inicijativa je da općinske službe utvrde činjenično stanje u vezi nedostataka na sportskoj dvorani „Anes Begić“ i da Općina Kakanj opredijeli sredstva za uklanjanje postojećih nedostataka, uočenih već u prvoj godini rada dvorane kako bi sale u dvorani bile funkcionalne i upotrebljive tokom cijele godine. Podsjetio je da je iz Budžeta Općine izdvojeno 900.000 KM za izgradnju dvorane.

Marcela Ravlija: je pokrenula dvije vijećničke inicijative. Prva je da se osigura rad dežurne apoteke u blizini Doma zdravlja. Ističe kako u Kaknju trenutno nijedna apoteka ne radi poslije 22:00, te su građani dovedeni u nezavidan položaj, jer u slučaju da zbog zdravstvenih problema ili dolaska u Službu hitne pomoći, trebaju određeni lijek, isti nemaju mogućnost kupovine neophodnih lijekova poslije 22:00. Smatra da je potrebno organizirati 24h rad apoteke u našem gradu i to na lokaciji koja najbolje odgovara pacijentima (u krugu Doma zdravlja Kakanj). Druga inicijativa je da se pokrene inspekcijски nadzor u kamenolomu „Greiben“. Naime, u posljednjih nekoliko mjeseci sve su učestalija miniranja radi eksploatacije kamena na tom području, zbog čega je lokalno stanovništvo konstantno izloženo strahu i panici kao i materijalnim štetama koje nastaju na stambenim i pomoćnim objektima. Na posljednjem skupu mještana koji gravitiraju na tom području, koji su direktno ugroženi eksploatacijom, stečajni upravnik Hidrogradnje ponio se krajnje drsko, prijeteći mještanima rušenjem kuća i zatvaranjem lokalnog puta koji prolazi kroz kamenolom, ukoliko nastave sa negodovanjem zbog miniranja. S ciljem da se utvdi zakonitost rada i

učestala miniranja na području kamenoloma „Greiben“ traži da se utvrdi da li postoji Elaborat za eksploataciju na tom području, s obzirom na to da je firma u stečaju već duži niz godina, kao i da se utvrdi da li se poštuju zakonske procedure pri eksploataciji i miniranju i da li uopće postoje dozvole za miniranje, jer je miniranje prije nekoliko godina zabranjeno zbog blizine stambenih objekata. Smatra da je potrebno utvrditi da li se miniranje prijavljuje MUP-u u zakonskim rokovima i da li se provode mjere za saniranje prašine i buke na adekvatan način.

Namir Talić: je pokrenuo dvije vijećničke inicijative. Prva je da se porodice sa troje i više djece potpuno ili djelimično oslobode plaćanja komunalnih usluga plaćanja odvoza smeća, plaćanja vode i grijanja. Druga inicijativa je da Općina Kakanj pokuša iznaći rješenje kako bi se mladim bračnim parovima izašlo u susret na način da se prilikom gradnje kuće oslobode plaćanja urbanističke i građevinske dozvole, a oni mladi bračni parovi koji kupe stan da se novčano pomognu u istom iznosu.

Adnan Čobo: je pokrenuo dvije vijećničke inicijative. Prva je da se podesi sat na sahat-kuli i drugi javni satovi, ukoliko postoje na području općine Kakanj. Drugom inicijativom predlaže da se uz šetnicu preko puta gradske džamije projektuje i izgradi niz malih stiliziranih, vezanih poslovnih prostora „Mala čaršija“ gdje bi se, prije svega, prezentirali određeni stari zanati i drugi karakteristični detalji vezani za samu općinu Kakanj (uključujući česmu, klupe u blizini i sl).

Vinka Aletović: je pokrenula vijećničku inicijativu da se izgradi kanalizaciona mreža na području naselja Roščevina (Popare). Naime, mještani naselja Roščevina već duži niz godina traže umrežavanje kanalizacije na relaciji od OŠ u Roščevini pa do naselja Popare. Kanalizacija je odmaknuta od kuća svega nekoliko metara i mještanima predstavlja veliki problem i opravdani strah za zdravlje stanovništva, posebno djece. Mještani su spremni učestvovati u izradi projekta, a isto tako i uključiti inspekcijske organe na svim nivoima ukoliko se ništa ne poduzme po ovom pitanju.

Predsjedavajući je konstatovao da su vijećnici: Omer Musić, Edin Šljivo, Kenan Kozlo, Sabit Čehajić, Adis Mrkonjić i Amar Selimović podnijeli vijećničke inicijative bez korištenja govornice.

Omer Musić: je pokrenuo vijećničku inicijativu da se zamijeni postojeći kontejner u Ulici branilaca kod novoizgrađenog stambeno-poslovnog objekta „Sunce“, postavljanje novog podzemnog kontejnera. Smatra da bi se postavljanjem podzemnog kontejnera uveliko olakšalo građanima, jer trenutno stanje na prostoru oko kontejnera stvara velike probleme, kako stanarima pomenute zgrade, tako i ostalim građanima tog dijela grada. Postavljanjem podzemnog kontejnera bi se onemogućilo raznim životinjama da se na tom prostoru okupljaju i smeće raznose, te tako stvaraju nehigijenski i ružan prizor.

Edin Šljivo: je pokrenuo vijećničku inicijativu da se u što skorije vrijeme nađe rješenje za rad dežurne apoteke iza 23:00. U tom cilju predlaže da Općina sufinansira radnike koji bi radili poslije 23:00 jer se mnogi građani žale na taj problem obzirom da u slučaju nužde radi kupovine lijekova moraju ići u susjedne gradove.

Kenan Kozlo: je pokrenuo vijećničku inicijativu da se postave info-table/putokazi na više lokacija na području izletišta Ponijeri, te da se postave klupe za sjedenje na širem području izletišta. Obzirom da se posljednjih godina povećava broj posjetitelja izletišta Ponijeri, ukazuje se potreba za postavljanjem info-tabli sa detaljnim informacijama na više lokacija koje bi svim posjetiteljima olakšale kretanje na području Ponijera. Također, klupe za sjedenje su potrebne na širem području Ponijera, jer bi mnogo značile šetačima, rekreativcima i svim drugim posjetiteljima, čime bi se boravak na Ponijerima učinio mnogo ugodnijim.

Sabit Čehajić: je pokrenuo vijećničku inicijativu da se izvrši inspekcijski pregled putne komunikacije Donji Kakanj-kamenolom Trgošped, dolinom rijeke Ribnice, te da se dostavi zapisnik o stanju saobraćajnice, kao i da se odgovori da li postoje uslovi za bezbjedan saobraćaj vozila i kakvo je stanje iste u smislu materijalno-tehničke i bezbjednosne situacije učesnika u saobraćaju.

Adis Mrkonjić: je pokrenuo vijećničku inicijativu da se postavi saobraćajno ogledalo na raskrnici za skretanje na Groce u MZ Donji Kakanj. Mišljenja je da je navedena raskrsnica opasna za učesnike u saobraćaju koji se kreću u pravcu osnovne škole i iz pravca zaseoka Groce.

Amar Selimović: je pokrenuo vijećničku inicijativu da se instalira adekvatna oprema za usporavanje brzine kretanja vozila u naselju Bilješevo na području kod mosta (ležeći policajci, neki drugi usporivači, stacionarni radari i sl.). Inicijativu podnosi iz razloga što je velika frekvencija pješaka (radnika, učenika, korisnika ambulante, pošte i dr.) koji moraju preći regionalnu cestu na tom području i to najmanje dva puta dnevno. Smatra da saobraćajni znak nije dovoljan, a ni pješački prelaz, jer vozači niti jedno ne poštuju, te bi moglo doći do neželjenih posljedica.